

- प्रधानमंत्री नरेन्द्र मोदी कह्यो-देश 'विकसित भारत' बणावण सारु एकजुटं
- प्रदेश री स्कूलां मांय आज मेगा पीटीएम राख्यी ज्यी-मुख्यमंत्री भजनलाल शर्मा नौजवानां ने आगे बधावण ने राज्य सरकार री प्राथमिकता बतायों
- मुख्य निर्वाचन आयुक्त ज्ञानेश कुमार साफ वोटर लिस्टां ने लोकतंत्र री बुनियाद बतायों
- राज्य रा केई हलकां मांय मावठ-जयपुर समेत केई जिलां मांय एक सेंटीमीटर तांई बिरखा व्हीं

000

प्रधानमंत्री नरेन्द्र मोदी कह्यो है के पूरो देश 'विकसित भारत' बणावण सारु एकजुट व्हे र काम कर रह्यो हैं वे आज केरल री राजधानी तिरुअनन्तपुरम मांय विकास री न्यारी-न्यारी परियोजनावां री सरुआत रे मौके बोल रह्या हां प्रधानमंत्री कह्यो के विकसित भारत बणावण मांय शहरां रो खास काम हैं वे कह्यो के केन्द्र सरकार लारला 11 साल ऊं शहरां मांय बुनियादी ढांचो और बेहतर बणावण सारु बत्ती रकम लगा रही हैं प्रधानमंत्री कह्यो के पीएम स्वनिधि योजना, रेहड़ी पटरी वाळां समेत आम जनता री जिंदगी ने आसान बणावण सारु चलायी ज्यी हीं

000

मुख्यमंत्री भजनलाल शर्मा कह्यो है के नौजवान ई देश अर प्रदेश रो भविष्य है अर राज्य सरकार वां ने दिशा देवण, मजबूत अर काबिल बणावण सारु खास कोशिशां कर रही हैं वे आज प्रदेश मांय राख्यी ज्यी मेगा अभिभावक-शिक्षक बैठक अर युवा संवाद रा जयपुर मांय राख्यी ज्यी राज्य स्तर रा कार्यक्रम मांय बोल रह्या हां मुख्यमंत्री कह्यो के सरकार मोटयारां ने सरकारी अर गैर सरकारी हलकां मांय नौकरी-धंधा रा मौका मुहैया करावण सारु कोशिश कर रही हैं वे कह्यो के नौजवानां ने खुद रा काम-धंधा सरु करण मांय मदद देवण सारु सरकार केई योजनावां चलायी है, ताकि वे नौकरी देवण वाळा बण सकें मुख्यमंत्री कह्यो के नौजवान घणा काबिल है अर वां ने मार्गदर्शन अर सहयोग री जरूरत हैं श्री शर्मा कह्यो के प्रदेश मांय लगातार सरकारी ओहदां माथे भर्तियां करी जा रही हैं

.....

मुख्यमंत्री कह्यो के टाबरियां ने आगे बधावण सारु ई सरकार लगातार कोशिश कर रही हैं वे ओएमआर शीट मांय कथित धांधली रो जिक्र करता थकां कह्यो के जो कोई गलत कीनो वां ने नी छोड़्या जावेलं

.....

मुख्यमंत्री विद्यार्थियां, वां रा मायतां अर अध्यापकां सागे ई बातचीत कीनीं वे न्यारी-न्यारी योजनावां रा तैत करीब 1 हजार करोड़ रुप्या री रकम विद्यार्थियां रा खातां मांय भेजीं

000

आजादी री लड़ाई मांय खास योगदान देवण वाळा नेताजी सुभाष चंद्र बोस ने आज वां री जयंती रे मौके देश सिरधाभाव सागे याद कर रह्यो हैं ई मौके राष्ट्रपति द्रौपदी मुर्मू, उपराष्ट्रपति सी.पी. राधाकृष्णन, प्रधानमंत्री नरेन्द्र मोदी अर गृहमंत्री अमित शाह ई वां ने श्रद्धांजलि दीनीं ओ दिन पराक्रम दिवस रा तौर ऊं ई मनायो जावे हैं प्रधानमंत्री नरेन्द्र मोदी वीडियो संदेश मांय कह्यो के आज रे दिन नेताजी सुभाष चंद्र बोस री हिम्मत, मजबूत इरादा अर देश रा प्रति बेजोड़ काम ने याद कर्यो जावे हैं

.....
प्रदेश मांय ई न्यारी-न्यारी ठोड़ां पराक्रम दिवस रे मौके खास कार्यक्रम राखी ज्यां भरतपुर मांय केई संगठनां री ओर ऊं नेताजी री मूरत माथे फूलमाळा चढ़ा र वां ने सिरधाभाव सागे याद करी ज्यां

000

राजस्थान संपर्क पोर्टल माथे दर्ज शिकायतां आगी करण अर वां माथे साफगोई सागे काम करण बाबत शिकायतां रा निपटारा री कार्यवाही रपट शिकायत करण वाळा रा व्हाट्सएप नम्बर माथे भेजी जावेलां जन अभाव अभियोग निराकरण विभाग रा अतिरिक्त मुख्य सचिव दिनेश कुमार आ जाणकारी दीनीं वे बतायो के व्हाट्सएप माथे मिलण वाळा लिंक रे जरिये शिकायत करण वाळा पूरी रपट देख र कार्रवाई रा बारा मांय राय दे सकेलां

000

मुख्य निर्वाचन आयुक्त ज्ञानेश कुमार कह्यो है के कानून रे मुजब वोट देवण रा पात्र सगळा लोगां रा नाम वाळी एकदम साफ वोटर लिस्ट लोकतंत्र री बुनियाद व्हे हैं वे आज नई दिल्ली मांय भारत अंतर्राष्ट्रीय लोकतंत्र और चुनाव प्रबंधन सम्मेलन-आई.आई.सी.डी.ई.एम. रा समापन सत्र मांय बोल रह्या हां वे कह्यो के तीन दिन री ई चर्चा मांय खास तौर ऊं पांच बिंदुआं माथे विचार करी ज्यो सम्मेलन मांय राजस्थान रा निर्वाचन विभाग री ओर ऊं खास जाणकारी दीरीजीं "चुनाव, मीडिया और मतदाता जागरूकता" मुद्दा माथे व्ही चर्चा मांय क्रोएशिया, कज़ाख़स्तान अर अमेरिका रा निर्वाचन अधिकारियां समेत भारत निर्वाचन आयोग रा महानिदेशक आशीष गोयल ई शामिल व्ह्यां ई मौके राजस्थान रा मुख्य चुनाव अधिकारी नवीन महाजन प्रदेश मांय चुनाव सारु कर्या जा रह्या नवाचारां अर काम रा बेहतर तरीकां री जाणकारी दीनीं

000

राष्ट्रीय मतदाता दिवस रा सिलसिला मांय आज पुलिस मुख्यालय समेत न्यारा-न्यारा दफतरां मांय शपथ लेवण रा कार्यक्रम राखी ज्यां जयपुर मांय पुलिस महानिदेशक राजीव शर्मा पुलिस रा अहलकारां अर कर्मचारियां ने लोकतांत्रिक मर्यादा बणाई राखण अर बिना डर्यां वोट देवण री शपथ दिरायीं अजमेर मांय राजस्थान लोक सेवा आयोग रा दफतर मांय ई अहलकार अर कर्मचारी निपख अर शांति सागे चुनाव रो मान बणायो राखण रो संकल्प लीनीं ई सिलसिला मांय आज राज्य निर्वाचन विभाग री ओर ऊं जयपुर रा जवाहर कला केन्द्र मांय राज्य स्तर री चित्रकला होड़ राखी ज्यो

000

राजस्थान लोक सेवा आयोग सांख्यिकी अधिकारी भर्ती परीक्षा मांय अपात्र उम्मीदवारां ने अर्जियां पाछी लेवण सारु चेतायो हैं आयोग साफ कीनो के ज्यां उम्मीदवारां कने तैय भणाई-पढ़ाई या अनुभव नीं है, वां ने 3 फरवरी ताई अर्जियां पाछी ले लेवणी चाहिजें आयोग रे मुजब तैय मियाद मांय अर्जियां पाछी नीं लेवण वाळां अपात्र उम्मीदवारां ने तीन साल ताई आयोग कानी ऊं ली जावण वाळी किण ई परीक्षा मांय नीं बैठण दिया जावेलां 113 ओहदां माथे भर्ती सारु ली जावण वाळी ई परीक्षा मांय मास्टर डिग्री सागे एक साल रो अनुभव जरूरी हैं

000

राज्य मांय आज केई ठोड़ां मावठ व्हेवण रा समाचार मिल्या हैं राजधानी जयपुर मांय तड़के ऊं रुक-रुक र बरसात व्हीं डीग मांय संवारे बादळां री गाज सागे बिरखा व्हीं हनुमानगढ़ मांय बीती रात व्ही तेज बरसात ऊं पारो उतर ग्यो मौसम विभाग ऊं मिली जाणकारी रे मुजब अजमेर, जयपुर, सीकर, श्रीगंगानगर, जैसलमेर अर बीकानेर जिलां मांय चोखी बिरखा व्हीं महकमो आज जयपुर, दौसा, अलवर अर टोंक जिलां मांय बरसात रो ऑरेंज अलर्ट जारी कीनो है, जठे हल्की ऊं मझला दर्जा री बिरखा रा आसार हैं महकमा रे मुजब आं हल्कां मांय कठे-कठे ओला पड़बा अर 13 जिलां मांय हल्की बरसात री संभावना हैं

000

प्रदेशभर मांय आज सरस्वती पूजन रो पर्व वसंत पंचमी हरख उमाव सागे मनायी ज्यो भरतपुर रा बांके बिहारी मंदिर मांय ठाकुरजी ने पीळी पोशाक पहरायी ज्यो डूंगरपुर जिला मांय साबला रा हरिमंदिर मांय महंत अच्युतानंद महाराज सतरंगी ध्वजा फहरा र सामाजिक समरसता रो संदेश दीनीं करौली रा कैमरी धाम मांय गृह राज्य मंत्री जवाहर सिंह बेढम री मौजूदगी मांय भगवान जगदीश रो वार्षिक मेळो भर्यो और ब्यौरो म्हांगा खबरनवीस ऊं -

000

केंद्रीय संस्कृति अर पर्यटन मंत्री गजेन्द्र सिंह शेखावत कह्यो है के भांत-भांत री चुनौतियां बीचे भारत री सांस्कृतिक भूमिका पैली ऊं बत्ती खास व्हे गयी हैं वे आज डीडवाना मांय तेरापंथ धर्मसंघ रा 162वां मर्यादा महोत्सव मांय बोल रह्या हां शेखावत कह्यो के दुनिया तनाव बीचे भारत ओडी आशा री निजर ऊं देख रही हैं केंद्रीय मंत्री नौजवानां अर साधकां ऊं पर्यावरण री हिफाजत करण अर माथो ऊंचो करण वाळी सभ्यता ने आगे बधावण सारु काम करण बाबत कह्यो

000

बांसवाड़ा रा कागदी पिकअप मांय आवता पंचायत अर निकाय चुनावं ने ध्यान राखता थकां आज आपदा प्रबंधन री तैयारियां रो जायजो लेवण सारु मॉकड्रिल करी ज्यीं वोट देवण ऊं जुड्या केई काम नाव रे जरिये कर्या जावण रे दौरान हादसां री शंका ने ध्यान राखता थकां पुलिस, सिविल डिफेंस अर स्वास्थ्य विभाग मिल र बचाव अभियान रो अभ्यास कीनों अतिरिक्त जिला कलेक्टर राजेश द्विवेदी बतायो के चुनाव रे दौरान किण ई भांत रा मुश्किल हालात मांय बेहतर तालमेल सारु आ ड्रिल करी ज्यीं

000

आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय प्रधानमंत्री नरेन्द्र मोदी 25 जनवरी दीतवार ने विचार बतावेलां आ ई कार्यक्रम री 130वीं कड़ी व्हेलां